

Il caricaturist Hans Moser alias signur Schüüch.

Signur schüüch è da chasa a Laax

*Enconuschais Vus signur Schüüch?
Il bab da questas caricaturas è Hans Moser. Dapi 33 onns
abitescha il cartoonist en Surselva.*

Naschè è Hans Moser l'onn 1922. En la vegliadetgna da tschintg onns emigreschan el e ses geniturs en ils Stadis Unids da l'America. Ils temps a Brooklyn n'èn dentant betg ils megliers.

Durant ils onns da la depressiun è il bab senza lavur, e fitg baud perda il mat er sia mamma. Hans Moser passenta intgins onns tar in'onda a Tennessee e returna lu puspè tar il bab.

Gia durant il temp da scola ha el sviluppa in'affinitad speziala per il disegnan. Hans Moser di: «Dissegnader e caricaturist, quai è adina stà mia professiun da siemi.»

Guerra e scola

Hans Moser ha strusch 20 onns ch'el - ch'è dal reminent burgais svizzer ed american - vegn clamà en l'armada dals Stadis

Unids. Igl è il temp da la segunda guerra mundiala. Ses temp da servetsch dura trais onns. El è staziunà en il Giapun ed en l'Italia. Sco recumpensa per ses temp activ en l'armada al pajà il stadi alura il studi a las scolas d'art da New York, Paris e Losanna.

Diesch onns lavura el suenter a Kopenhagen en il Danemarc. Là emprenda el era a conuscher Sonja che daventa sia dunna.

Signur Schüüch

1963 turna Hans Moser en Svirzra, en sia patria. «Pervia da las impostas», sco ch'el di cun bucca ridenta. Casualmain vegn el a savair d'ina onda che abitescha a Flem. Uschia sa chasa er el a Flem/Fidaz. Dapi 30 onns abitescha l'artist ussa a Laax. Sia chasa ch'el ha baghegià sin terren ch'el ha cumprà da lez temp per 15.--frs./m2 sa chatta sper la

via principala che maina vers Falera. Sch'el guarda or da la fanestra da sia stanza da lavur guarda Hans Moser giu sin la baselgia, sin il vitg da Laax e sin il panorama da las muntognas che circundeschan la vallada ch'è daventada sia patria.

«My home is my castle. Ma tuttina vom jau ina fin duas giadas l'onn a la mar, en il Danemarc u en l'Enghelterra. Las planiras ed il spazi - quai fa bain al spiert ed a l'olma».

Il caricaturist

In è bain betg surfatg da pretendere che Hans Moser tutga tar ils pli enconuschents caricaturists da la Svizra. Tranter auter ha el lavurà - e lavura per part anc oz - per la «Tribune de Genève», per il «Tages Anzeiger» e per il «Nebelspalter». En ils onns tschinquanta cumpara en

questa gasetta satirica lu era per l'emprima giada sia figura la pli famosa e renumada: il signur Schüüch. Enconuschent è era il Gloschi, il clochard e ses chaun, ch'ins entaupa emna per emna en l'Arena Alva, la gasetta locala da la regiun Flem/Laax/Falera.

La natira

In tema che vegn adina puspè avant en ils dissegns da Hans Moser è la natira. La natira che vegn surdurada dal carstgaun. Quai ch'el vesa ed auda sin las spassegiadas cun ses chaun Hendry vegn sil suenter savens comentà ed interpretà en la gasetta da Gloschi.

Atgnamain è Hans Moser sco el di sez, in pessimist. Tuttina spera el da pudair midar il mund - almain in zic - cun sias caricaturas e cun ses dessegns.

Erwin Ardüser

Chartas da lecturas

Igl è in plaschair da vesair co che la gasetta dal Coop sa stenta dapi insaquants onns da publitgar artitgels rumantschs ed er infurmaziuns sur da la quarta lingua nazionala. En moda simpatica vegnan preschentads differents aspects da noss pitschen «mund rumantsch» ad in public pli vast da linguatg tudestg. Quai è segir e franc in grond agid per augmentar la chapientscha e la bainvulientscha envers ina minoritad. Impurtant per nus Rumantschs è senza dubi la preschientscha regulara en in med da massa - e quai betg sulettamain avant la votaziun da l'artitgel 116! Cun engraziament e cordials salids

Ines Gartmann, Cuira


Cumpliment alla «Gasetta Coop» che publichescha dapi 10 onns ina pagina romantscha e che s'engascha aschia pil romantsch buca mo quels dis, ch'il romantsch ei per las buccas da tuts en vesta alla votaziun davart igl artechel da lungatgs.

G. Desax, Cuera

Nus publitgain gugent er reacziuns da Vossa part. Ans srivai: Redacziun gasetta Coop, chascha postalà 2550, 4002 Basilea.

PLEDARI

cumprar	kaufen
l'emna	die Woche
las impostas	die Steuern
la lavur	die Arbeit
l'onda	die Tante
puspè	wieder
strusch	kaum/knapp
surduvra	missbrauchen
surfar	übertreiben
la vegliadetgna	das Alter
in zic	ein wenig



Signur Schüüch.

La figura la pli famosa da Hans Moser.